

Sokongan PAS, UMNO bukti yakin kepemimpinan Dr M

BH - 30/7/2019 m/s: 23

Pendirian pembangkang selari usaha kembalikan kegemilangan negara

Oleh Petah Wazzan Iskandar
Wazzan@bh.com.my

Putrajaya: Sokongan PAS dan UMNO kepada Tun Dr Mahathir Mohamad adalah bukti keyakinan terhadap kepimpinannya yang berhemah tinggi sesuai dengan peranannya sebagai negarawan ulung negara.

Menteri Hal Ehwal Ekonomi, Datuk Seri Mohamed Azmin Ali, berkata kenyataan Presiden PAS, Datuk Seri Abdul Hadi Awang yang menegaskan pendirian PAS dan UMNO untuk memberikan sokongan penuh kepada Dr Mahathir sebagai Perdana Menteri

sehingga akhir penggal sangat dialu-alukan.

Beliau yang juga Timbalan Presiden PKR berkata, pendirian parti pembangkang itu juga adalah selari dengan pandangannya sebelum ini supaya usaha mengembalikan kegemilangan negara dapat direalisasikan dengan segera.

“Kepimpinan Perdana Menteri diperlukan untuk menjamin kestabilan, kesinambungan dan ketuntasan (consistency) dasar kerajaan bagi merangsang pelaburan, mencipta peluang pekerjaan serta kekayaan untuk semua.

“Dukungan bipartisan terhadap Dr Mahathir adalah lembaran baharu dalam politik Malaysia di mana kepentingan rakyat diberikan keutamaan. Maka mandat rakyat yang diterima oleh Pakatan Harapan (PH) lebih setahun lalu memerlukan kestabilan demi melaksanakan reformasi institusi dan langkah-langkah positif untuk memulihkan ekonomi.

“Kejayaan melaksana agenda serampang dua mata ini akan



Kejayaan melaksana agenda serampang dua mata ini akan memberikan manfaat kepada semua rakyat tanpa mengira fahaman politik mereka.

**Mohamed Azmin Ali,
Menteri Hal Ehwal Ekonomi**

memberikan manfaat kepada semua rakyat tanpa mengira fahaman politik mereka,” katanya dalam satu kenyataan semalam.

Mohamed Azmin berkata, sebagai sebuah negara yang mengamalkan demokrasi, perbezaan pandangan politik akan tetap wujud.

“Namun, beliau berkata, setiap perbezaan itu perlu diurus dengan baik demi menjamin kepentingan rakyat.

“Saya yakin kestabilan politik menjaga keutuhan dasar dan kebijakan negara termasuk konsep ‘shared prosperity’ yang bakal mengembalikan Malaysia sebagai Harimau Asia,” katanya.

Sabtu lalu, Abdul Hadi dipetik sebagai berkata partinya dan UMNO akan bekerjasama untuk mengekalkan Dr Mahathir sebagai Perdana Menteri sehingga tamat tempoh satu penggal mandat Pilihan Raya Umum Ke-14, walaupun ada perjanjian dalam PH untuk Perdana Menteri melepaskan jawatan kepada Presiden PKR, Datuk Seri Anwar Ibrahim, sebelum habis penggal penuh.